

sibus, incubuere maria tam logo auro, alibi processere littora, torserunt se & fluminum aut correxere flexus. Præterea aliunde alijs exordium mensuræ est, & alia meatus: ita fit ut nulli duo concinant.

Beticæ longitudo & latitudo. CAP. II.

Beticæ longitudo nunc à Castulonis oppidi sine Gadeis cccclxxv. M. & à Murgi maritima ora xxv. M. pass. amplior. Latitudo à Carteiana ora cccxliij. M. pass. Agrippam quidem in tanta viri diligentia, præterq; in hoc opere cura, cum orbem terrarum ubi spectandum propositurus esset, errasse quis credat, & cum eo diuum Augustum? Is nanque complexam eum porticum ex destinatione & commentariis M. Agrippæ à sorore eius inchoatam peregit.

Hispania citerior. CAP. III.

Citerioris Hispaniæ sicut complurium prouinciarum aliquantum vetus forma mutata est, utpote cū Pompeius Magnus trophæis suis, quæ statuebat in Pyrenæo d. cccxlvi. oppida ab Alpibus ad fines Hispaniæ vltioris in ditionem à se redacta testatus sit. Nunc uniuersa prouincia diuiditur in conuentus septem, Carthaginensem, Tarraconensem, Cæsaraugustanum, Cluniensem, Asturum, Lucensem, Bracarum. Accedunt insulae, quarum mentione* seposita, præter ciuitates contributas alijs, prouincia ipsa cccxliij. continet oppida. In ijs colonias xii. oppida ciuium Romanorum xliij. Latinorum veterum xvii. federatorum vnum, stipendiaria* cxxxii. Primi in ora Bastuli, post eos quo dicitur ordine intus recedentes Mentefani, Oretani, & ad Tagum Carpetani, iuxta eos Vaccei, Vætones, & Celtiberi, Arrebaci. Oppida ore proxima, Vrci, adscriptum Beticæ Barea, regio Mauritania, mox Deitania, dein Contestania, Carthago noua, colonia: cuius à promontorio quod Saturni vocatur, Cæsariam Mauritaniæ urbem clxxxvii. M. pass. traiectus. Reliqua in ora flumen Tader, Colonia immunitis, Illici, vnde Illicitanus sinus, in eam contribuantur Icositani, mox Latinorum Lucentum, Dianium stipendiariam, Suero fluius, & quondam oppidum, Contestania finis. Regio Edetana amæno prætendente se stagno ad Celtiberos recedens, Valentia colonia iij. M. pass. à mari remota: flumen Durias: tantundem à mari Saguntum ciuium Romanorum oppidum, fide nobile: flumen Idubeda: regio Ilergaonum. Iberus annis nauigabili commercio diues, ortus in Cantabris haud procul oppido Iuliobrica, ccccl. M. pass. fluens, nauium per cclx. M. à Varia oppido capax, quem propter vniuersam Hispaniam Græci appellauere Iberiam. Regio Cossætania, flumen Subi, colonia Tarraco Scipionum opus, sicut Carthago Pænorum. Regio Ilergetum, oppidum Subur, flumen Rubricatum, à quo Laletani & Indigetes. Post eos quo dicitur ordine intus recedentes radice Pyrenæi, Ausetani, Itani, Lacetani, perque Pyrenæum Cerretani, dein Vascones. In ora autem colonia Barcino, cognomine Fauentia. Oppida ciuium Romanorum, Betulo,

Illuro. Flumen Larnum, Blandæ: flumen Alba, Emporiæ: geminum hoc, veterum incolarum, & Græcorum, qui Phocensium fuere soboles. Flumen Tichis. Ab eo Pyrenæa Venus in latere promontorii altero xl. M. Nunc per singulos conuentus reddentur insignia præter supradicta. Tarracone disceptant populi xliij. quorum celeberrimi ciuium Romanorum Dertusani, Bigargitani. Latinorum Ausetani, Cerretani, qui Iuliani cognominantur, & qui Augustani, Sedetani, Gerundenses, Gessoriensis, Teari, qui Iulenses. Stipendiariorum Aquicaldenses, Onenses, Betulonenses. Cæsaraugusta colonia immunitis amne Ibero affusa, ubi oppidum antea vocabatur Salduba, regionis Sedetaniæ, recipit populos liij. Ex his ciuium Romanorum Bellitanos, Celsenses. Ex colonia Calaguritanos, qui Nascici cognominantur. Ilerdenses Sardoanum gentis, iuxta quos Sycoris fluius: Osoenses regionis Vescitania, Turiasonenses. Latinorum veterum Cascatenses, Ergauicenses, Graccuritanos, Leoniceses, Ossigerdenses. Federatos Tarragenses. Stipendiarios Arcobricenses, Andologenses, Arocelitanos, Bursaonenses, Calaguritanos, qui Fibularenses cognominantur: Complutenses, Carenses, Cincenses, Cortonenses, Dammanitanos, Larnenses, Ilurcenses, Spalenses, Ilumbritanos, Lacetanos, Vibiensis, Pompeionenses, Segiensis. Carthaginem conueniunt populi lxij. exceptis insularum incolis. Ex colonia Accitana Gemellenses, Libisofona cognomine Foroaugustana, quibus duabus ius Italiæ datum. Ex colonia Salariente oppidani Latii ueteris Castulonenses, qui Cæsari venales appellantur. Setabitani, qui Augustani, Valerenses. Stipendiariorum autem celeberrimi, Babanenses, Bastitani, Consaburenses, Dianenses, Egelestani, Ilorcitani, Laminitani, Mentefani, qui & Oritani, Mentefani, qui & Bastuli, Oretani, qui & Germani cognominantur, caputque Celtiberiæ, Segobrigenses, Carpetani, & Toletani Tago fluminis impositi. Dein Viacienses, Virgilienses. In conuentum Cluniensem Varduli ducunt populos xliij. ex quibus Labanenses tantum nominare libeat, Turmodigi quatuor, in quibus Segisamonenses, Segisamaiulenses. In eundem conuentum Carietes, & Vennenses, quinque ciuitatibus vadunt, quarum sunt Velienses. Eodem Pelendones, Celtiberorum quatuor populis, quorum Numantini fuere clari: sicut in Vacceorum xvij. ciuitatibus Intercatienses, Palantini, Lacobricenses, Caucenses. Nam in Cantabricis quatuor populis, Iuliobrica sola memoratur. In Autrigonum decem ciuitatibus Tricium, & Virouesca. Areuacis nomen dedit fluius Arena. Horum sex oppida, Saguntia, & Vxama, quæ nomina crebro alijs in locis vsurpantur, præterea Sagouia, & noua Augusta, Termes, ipsaque Clunia Celtiberiæ finis. Ad Oceanum reliqua vergunt, Vardulique ex prædictis & Cantabri. Iunguntur his Asturum xii. populi, diuisi in Augustanos Asturica urbe magnifica. In ijs sunt

*seposita, ciuitates prouincia ipsa præter contributas alijs cccxliij. continet, oppida clxxxix. * cxxxvij.